


Merī Jagah

Qurbānī kā Maqsad



merī jagah. qurbānī kā maqsad

In My Stead. The Purpose of Sacrifice

by Bakhtullah

[*Zinda Kalam 10*]

(Urdu—Roman script)

© 2026 Chashma Media.
published and printed by
GWCS, New Delhi

Bible text is from UGV.

illus. M. Heindl; R. Gunther <https://freebibleimages.org/illustrations/lb-abraham-isaac/>

for enquiries or to request more copies:
askandanswer786@gmail.com

Fahrist

Merī Jagah Be-Aibī	3
Merī Jagah Gunāhgār	4
Merī Jagah Maut kī Sazā	5
Merī Jagah Jān kī Qurbānī	5
Asl Qurbānī Īsā Masīh Hai	8
Asl Qurbānī se Bahālī Yaqīnī	9
Tauret, Ahbār 4:13-21	10

Jab Ẹhudā Isrāīlī qaum ko Misr se nikāl lāyā to un ke lie īmān kā safr shurū huā. Chalte chalte wuh Sīnā Pahār par pahunch gae. Wahān Ẹhudā ne unheñ




zindagī kī rāh dikhāī. Jo us par chal paṛe us kā Ẹhudā aur dūsron ke sāth rishtā bahāl rahtā hai. Shart yih hai ki wuh wafādār rahe.

- *Kyā ab se Ẹhudā aur qaum ke darmiyān rishtā achchhā rahā?*

Afsos, aisā nahīn thā. Ham apnī jarsī se dhūl to jhāṛ sakte haiñ. Lekin gunāh ko ham itnī āsānī se jhāṛkar apne āpse dūr nahīn kar sakte. Yon Isrāīlī qaum bār bār gunāh meñ uljhī rahī. Gunāh itnī mazbūtī se insān ke andar aṭkā rahtā hai jitnī mazbūtī se guṭhlī ām ke andar aṭkī rahtī hai. Ām, guṭhlī ke binā hotā hī nahīn. Insān bhī gunāh ke binā hotā hī nahīn.

- *Kyā insān is hālat meñ pāk Ẹhudā ke huzūr ā saktā hai?*

Nahīn. Gunāh se use Ẹhudā se dūr hī dūr rahnā partā hai.



Lekin *Ḳhudā* rahmdil hai. Wuh *chāhtā* hai ki *insān* mere *huzūr āe*, ki wuh mujh se *rifāqat* rakhe. Isliē us ne apnī *mehrbānī* se yih *kamī dūr* karne *kā ek rāstā* khol *diyā*.

► *Us ne kyā rāstā khol diyā?*

Us ne *sharīat* *kā ek intazām* qāym *kiyā tāki* *insān* *gunāh* se *āzād* hokar *Ḳhudā* ke *huzūr ā* sake, us se *rifāqat* rakh sake.

► *Kaun-sā intazām?*

Qurbānī *kā intazām*.

► *Yih intazām kis tarah hamārī Ḳhudā se rifāqat bahāl kartā hai?*



Yih gunāh ko dūr karne se ẖhudā se rifāqat bahāl kartā hai. Islie lāzim thā ki tamām log qurbānī pesh karen. Is qurbānī ke lie bail, bher yā bakrī istemāl hotī thī.

- *Qurbānī ke pīchhe kyā ẖhyāl hai?*
Pahlā ẖhyāl,

Merī Jagah Be-Aibī

Tauret mein likhā hai,

Jab logon ko patā lage ki ham ne gunāh kiyā hai to jamāt mulāqāt ke ẖhaime ke pās ek jawān bail le āe aur use gunāh kī qurbānī ke taur par pesh kare.



- *Jānwar ko kyon insān kī jagah qurbān kiyā jātā thā?*

Islie ki wuh be-aib thā. Sirf be-aib jānwar mañzūr thā (Ahbār 1:3) . Dūsrā khyāl,


Merī Jagah Gunāhgār

Likhā hai,

Jamāt ke buzurg Rab ke sāmne apne hāth us ke sar par rakheñ, aur wuh wahīn zabah kiyā jāe.

- *Insān apnā hāth jānwar ke sar par rakh detā thā. Yih kyon?*

Is se us kā gunāh jānwar par muntaqil ho jātā thā. Tīsrā khyāl,



Merī Jagah Maut kī Sazā

- *Tab jānwar ko zabah kiyā jātā thā. Yih kyon?*

Use insān kī jagah zabah kiyā jātā thā, jo apne gunāhoñ ke bāis sazā-e-maut ke lāyq thā. Chauthā khyāl,

Merī Jagah Jān kī Qurbānī

Likhā hai,

Phir imām-e-āzam jānwar ke kḥūn mein se kuchh lekar mulāqāt ke kḥaime mein jāe. Wahān wuh apnī unglī us mein dālkar use sāt bār Rab ke sāmne yānī muqaddastarīn kamre ke parde par

chhirke. Phir wuh khaime ke andar kī us qurbāngāh ke chāron sīngon par khūn lagāe jis par baḥūr jalāyā jātā hai. Bāqī khūn wuh bāhar khaime ke darwāze kī us qurbāngāh ke pāe par unḍele jis par jānwar jalāe jāte haiñ.


- *Imām khūn ko maqdis kī muḥtalif chīzon par chhirak detā hai. Kyon?*

Khūn jān kā nishān hai. Yon Tauret mein likhā hai,

Har maḥlūq ke khūn mein us kī jān hai. Mainne use tumhein de diyā hai tāki wuh qurbāngāh par tumhārā kaffārā de. (Aḥbār 17:11)



Is ke bād imām jānwar kī tamām charbī qurbāngāh par



aur bāqī hissā ḵhaimāgāh ke bāhar jalā detā thā.
Likhā hai,

Yon wuh logon kā kaffārā degā aur unhen
māfi mil jāegī.

- *Qurbānī se logon ko kyā miltā thā?*
Un kā kaffārā diyā jātā thā aur unhen māfi mil jātī
thī.
- *Lekin kyā jānwar kī qurbānī sachmuch insān ke
gunāhon ko dūr kar saktā thā?*
Hargiz nahīn. Isle likhā hai,


Mumkin hī nahīn ki bail bakron kā
ḵhūn gunāhon ko dūr kare.
(Injil, Ibrāniyon 10:4)

Jānwaroṇ kī qurbāniyāṇ sirf asl kā sāyā thīn.
Wuh sirf us āne wālī qurbānī kī taraf ishārā thīn
jo sachmuch insān ke gunāhoṇ ko dūr kar saktī
thī. Islie pāñchwān khyāl,

Asl Qurbānī Īsā Masīh Hai

► *Asl qurbānī kaun hai?*

Īsā Masīh. Islie Yahyā Nabī, Īsā Masīh ko dekhte
hī pukār uṭhā,



Dekho, yih Allāh kā lelā hai jo duniyā
kā gunāh uṭhā le jātā hai.

(Injīl, Yūhannā 1:29)

Īsā Masīh ne apnā kḥūn salīb par bahāne se wuh
qurbānī dī jis se insān ke gunāhoṇ ko sachmuch

miṭāyā jāṭā hai. Jis tarah ek aur jagah par likhā hai,

Tujhe zabah kiyā gayā, aur apne ḵhūn se tūne logoñ ko har qabīle, har ahl-e-zabān, har millat aur har qaum se Allāh ke lie ḵharīd liyā hai.

(Injīl, mukāshafā 5:9)

Jānwaroñ kī qurbāniyāñ gunāhoñ ko miṭāne kā ārizī wasīlā thīñ jabki asl qurbānī dāymī hai. Usī se gunāhoñ ko miṭāne kā muassir rāstā khul gayā. Īsā Masīh meñ wuh be-aibī hai jo mujh meñ pāi nahīñ jāṭī. Phir bhī wuh merī jagah gunāhgār ṭhahrā. Use merī jagah maut kī sazā mili. Merī hī jagah us ne apnī jān dī tāki main Ḵhudā ko mañzūr ho jāūñ. Ek āḵhirī ḵhyāl,

Asl Qurbānī se Bahālī Yaqīnī

- *Is qurbānī se hamārā Ḵhudā se rishtā badal jāṭā hai. Kaise?*

Is qurbānī se hamārā Ḵhudā se rishtā bahāl ho jāṭā hai. Tab ham har waqt Ḵhudā ke huzūr ā sakte haiñ, us kī rifāqat meñ rah sakte haiñ. Shart yih hai ki ham us kī yih qurbānī qabūl karen.

► *Kyā āpne us kī yih qurbānī qabūl kar lī hai?*

Tauret, Ahbār 4:13-21

Agar Isrāīl kī pūrī jamāt ne ġhairirādī taur par gunāh karke Rab ke kisī hukm se tajāwuz kiyā hai aur jamāt ko mālūm nahīn thā to bhī wuh qusūrwar hai. Jab logon ko patā lage ki ham ne gunāh kiyā hai to jamāt mulāqāt ke khaime ke pās ek jawān bail le āe aur use gunāh kī qurbānī ke taur par pesh kare. Jamāt ke buzurg Rab ke sāmne apne hāth us ke sar par rakheñ, aur wuh wahīn zabah kiyā jāe. Phir imām-e-āzam jānwar ke kḥūn meñ se kuchh lekar mulāqāt ke khaime meñ jāe. Wahān wuh apnī unglī us meñ ḍālkar use sāt bār Rab ke sāmne yānī muqaddastārīn kamre ke parde par chhiṛke. Phir wuh khaime ke andar kī us qurbāngāh ke chāron sīngoñ par kḥūn lagāe jis par baḡhūr jalāyā jātā hai. Bāqī kḥūn wuh bāhar khaime ke darwāze kī us qurbāngāh ke pāe par unḍele jis par jānwar jalāe jāte haiñ. Is ke bād wuh us kī tamām charbī nikālkar qurbāngāh par jalā de. Us bail ke sāth



wuh sab kuchh kare jo use apne zātī ḡhairirādī gunāh ke lie karnā hotā hai. Yoñ wuh logoñ kā kaffārā degā aur unheñ māfī mil jāegī. Āḡhir meñ wuh bail ko ḡhaimāgāh ke bāhar le jākar us tarah jalā de jis tarah use apne lie bail ko jalā denā hotā hai. Yih jamāt kā gunāh dūr karne kī qurbānī hai.